



**Les Fleurs Des Vies Des Saints Et Des Festes De Toute  
L'Annee, Sivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles  
Borromeo, & de Sainte Françoise ; Avec le Martyrologe Romain, pour  
tous les iours de l'Annee ...

**Ribadeneyra, Pedro de**

**Paris, 1631**

VII La vie de S. Moyse Anachorete, Euesque & Confess.

---

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

LA VIE DE SAINT MOÿSE,  
Anachorete, Euesque & Confesseur.



7.  
FEV.

Es grands Saints & amis de Dieu, ne sont pas seulement la lumiere & l'ornement de l'Eglise; mais aussi la protection & defence d'icelle, qui par leurs prieres & vertus conferuent mieux les Royaumes & Prouinces, que les armées & garnisons qu'ils mettēt sur leurs frontieres. Nous voyons cela au saint Anachorete Moÿse, duquel nous escriuons la vie, qui auerera nostre dire. Car l'Empereur Valens (qui estoit heretique Arrien) ayant iuré la guerre contre l'Eglise Catholique, dont il persecutoit les Prelats & saints Docteurs, pour esbranler les colonnes qui la supportoient, nostre Seigneur permit que les nations barbares se reuolterent contre luy, qui mirent à feu & à sang plusieurs Prouinces de son Empire, entr'autres les Sarrazins, que d'aucuns nommoient Ismaélites, s'y rendirent tant opiniastrés, qu'après la mort de leur Prince ils attaquèrent Valens avec plus de force & de courage, d'autant que Mauie, femme de leur defunct Roy, print la Regence de la paix & de la guerre d'un courage viril & constant, entra en bataille rangée contre l'armée Imperiale, qu'elle desconfit & mit à vauderoute, de façon qu'elle obligea l'Empereur de s'humilier, & demander la paix à vne femme victorieuse & triomphante de son armée. La courageuse Royne Mauie ne voulut point prester l'oreille au pourparler de paix, iusques à ce que l'Empereur & ses Capitaines, continuans de l'en solliciter, nostre Seigneur luy ayant amoly le cœur (parce qu'elle s'estoit faite Chrestienne) l'accorda, sous condition qu'on luy bailleroit saint Moÿse pour estre Euesque de son peuple. Moÿse estoit vn Hermite d'vne grande sainteté, qui viuoit dans le desert, & sur les confins des Sarrazins, lesquels à cause du voisinage, auoient bonne cognoissance de ses vertus & miracles, & d'autant que quelques vns d'entr'eux auoient esté catechisez par l'Abbé saint Hilarion (au rapport de saint Hierosime en sa vie) & esclairez de la lumiere de l'Euangile, la Royne Mauie desira, d'auoir avec soy vn Euesque qui cultiuast ceste terre en friche, & fomentast les estincelles qui s'estoient allumées dans les esprits de ses subjects. Quand l'Empereur entendit parler de ceste condition que la Royne desiroit es articles de la paix, quoy qu'il fust Heretique, & sceut bien que Moÿse estoit Catholique, il dissimula neantmoins en matiere d'Estat, & commanda qu'on le trouuast, & qu'il fust sacré Euesque, pour estre aussi-tost enuoyé vers la Royne, estant pressé de conclure la paix avec elle. Les gens de l'Empereur chercherent le saint Hermite Moÿse, auquel ils declarerent l'intention de Valens, mais plustost celle de Dieu, afin qu'estant Euesque & agreable à la Royne, il deliurast le peuple Romain de la detres-

se où il se trouuoit reduit, & appaisast par le moyen de la paix les vents & l'orage qu'on craignoit de la continuation de la guerre. Le Saint se soumit, quoy qu'il se iugeast indigne de ceste charge, estimant que c'estoit la volonté de Dieu, qui desiroit se seruir de luy pour le bien de son peuple. Il fut conduit en Alexandrie, afin que le Patriarche Lucius le consacra, lequel estoit heretique Arrien, cruel, & vne beste farouche, qui auoit enuahy ce siege par violence, & d'vne furieuse rage auoit fait vne sanglante boucherie des Catholiques. Quand Moÿse vid Lucius, il dit aux Capitaines qui l'accompagnoient: Je ne suis pas digne d'estre Euesque, ie ne le desire pas aussi, mais si Dieu veut que ie le sois, & si sa prouidence diuine l'a ainsi ordonné, ie suis tout resolu de n'estre iamais consacré de la main de Lucius, ny de receuoir l'imposition de ses mains. Le Patriarche Heretique se troubla fort de ce qu'auoit dit Moÿse, & luy respondit qu'il estoit mal informé, & qu'il deuoit s'enquerir de sa foy auant que de le condamner. Alors le Saint luy repliqua: Tes œuures parlent assez, ô Lucius! auxquelles nous adioustons plus de foy qu'à tes paroles, tes mains sont trop sanglantes, tu as chassé les saints Euesques de leurs sieges, banny les vns, emprisonné les autres, & affligé tous les Catholiques, & tu veux maintenant que nous n'adioustrions pas tant de foy à ce que nous voyons, qu'à ce que nous oyons? En fin, les Officiers de l'Empereur permirent à Moÿse, par vneraison d'estat, d'aller trouuer d'autres Euesques Catholiques exilés & cachez, pour estre sacré de leurs mains, ce qui apprend aux Catholiques combien il faut fuir tout ce qui vient des Heretiques. Il fut donc sacré & deliuré à la Royne des Sarrasins, qui s'en resioiuit extrêmement, & le saint Euesque par sa vie celeste, & doctrine admirable, confirmée par tant de miracles que Dieu opera par luy, illumina ce peuple, & l'attira à la cognoissance de Iesus-Christ, luy imposant le joug suau de l'Euangile, & fit si bien, que la Royne Mauie donna vne sienne fille en mariage à Victor, Capitaine general de l'armée Imperiale: & depuis l'Empereur Valens ayant esté defaict en bataille par les Gots, & bruslé tout vif par eux dans vne chaumine, où il s'estoit sauué à la fuitte, ayans assiégré Constantinople les Sarrazins la secoururent si à propos, que les Gots furent contraints de leuer le siege sans rien faire. Tout cela se fit par le moyen du saint Euesque Moÿse, qui acheua heureusement en paix le cours de sa vie. Il est fait mention de luy es Martyrologes Romains, de Bede, Vsuard, & Adon, le septiesme de Feurier. Ruffin, Socrates, Sozomene, Theodoret, Nicephore, & le Cardinal Baronius, es Annotations sur le Martyrologe, & au quatriesme Tome de ses Annales.

7.  
FEV.